

Inatsisartut suleriaasiat § 33 naapertorlugu Inatsisinut Ataatsimiititaliami ilaasortat matumuuna aalajangiiffigisassatut siunnersuut saqqummiuppaat:

Inatsisartut Ombudsmandiata 2017-imut ukiumoortumik nalunaarutaata Inatsisartunit tusaatissatut tiguneqarnissaanik Inatsisartut aalajangiiffigisassaattut siunnersut.

(Inatsisinut Ataatsimiititaliaq: Anders Olsen ataatsimiititaliap Siulittaasua, Siumut, Sofia Geisler, ataatsimiititaliap Siulittaasuat tullia, Inuit Ataqtigiit, Stine Egede, Inuit Ataqtigiit, Justus Hansen, Demokraatit, Aleqa Hammond, Nunatta Qitornai)

Tunngavilersuut:

Allaffissornikkut aqutsinerup inatsisini sinaakkusiussat iluanni kiisalu ingerlatsivinni inatsisitigut malitarisassat iluini ingerlanneqarnissaa pillugu Inatsisartut inatsisiliortutut Ombudsmandi nakkutilliisussatut suliaqarnissaanik pisussaaffilerpaat. Taamaalilluni Ombudsmandi Inatsisartut Naalackersuisunik nakkutilliinerannut sakkuuvoq, kisiannili aamma nunap innuttaasa eqqartuussiveqarnikkut illersugaanissaannut qulakkeerinnittuulluni. Ombudsmandi taamaalilluni tassaavoq *Inatsisartut innuttaasullu* ataatsimut Ombudsmandiat.

Inatsisartut Ombudsmandiat ukiut tamaasa Inatsisartunut nalunaarusiortarpoq, tassa ukiumi qaangiuttumi Ombudsmandip suliarisarsimasani nalunaarusiaralugit.

Ombudsmandip 2017-mut ukiumoortumik nalunaarusiaani – maannamut pisarnertut – suliat arlallit malittarisassatut tunngavimmi namminerimi imaluunniit malittarisassat allaffissuutigineranni kukkunerit amigaatillu nalunaarutigineqarsimasut ilanngunneqarsimapput.

Ukiuni kingullerni Ukiumoortumik Nalunaarutit aamma, ajornartorsiutit minnerunngitsumik oqartussaasunut Inatsisartunullu soqutiginaateqartut pillugit, allaaserisanik ataasiakkaanik imaqtarsimapput.

Taamaalilluni innutaasut piginnaatitaaffitsigut isumannaatsuutinnissaat pisortatullu oqartussat suliassaminnik suliarinnittarnissaat nukittorsartuarneqaqqullugu anguniagaqarnitsinni ukiumoortumik nalunaarusiaq sakkutut ikiuutitullu atorineqarsinnaavoq.

Inatsisinut Ataatsimiititaliap maluginiarpaa Ombudsmandip oqaaseqaataasa ilaat ataaseq 2017-imi ukiumoortumik nalunaarummut ilanngunneqarsimasoq tamat suliat pillugit paasitinneqarsinnaatitaanerannut tunngassuteqartoq. Ombudsmandip oqaaseqaataa alla killiligaanngitsumik oqaaseqarsinnaatitaanerannut tunngassuteqarpoq, tassunga ilanngullugu pisortani atorfillip suliffigisami pissutsit pillugit isornartorsiulluni oqaaseqarsinnaanerannut.

Oqaaseqaatit oqaaseqarsinnaatitaanerup kiisalu tusagassiorfiit suliat pillugit paasitinneqarsinnaatitaanerannut tamat oqartussaaqataanerannut ingerlalluartumut tunngaviulluinnarlutik piunasaqaataanerannik eqqaasitsissutiginninnissamut Inatsisinut Ataatsimiititaliaq tunngavissippaat, taamatullu ingerlatsinerup ammasuunerannut paasiuminartuunerannullu peqatigitillugulu oqartussaassutsimik ingerlatsinitsinnik innuttaasut

tatiginninnerannut pingaarutilimmik piumasaqaataanerannik.

Pisortat ingerlatsinerat pillugu paasissutissanik tamat pissarsisinnaanerat, pisortanilu atorfillit ingerlatsineq pillugu inatsisit killiliussaasa iluanni isornartorsiuisinnaatitaanerat aamma oqartussaasut kukkunerannik naapertuutinngitsuliernerannillu qulaajaaviginninnissamut iliuseqarfiginninnissamullu tapiutaaqataasinnaapput.

Inatsisinut Ataatsimiititaliap isumaqatigiittup taamatut oqaaseqarluni Inatsisartut Ombudsmandiata 2017-imut nalunaarutaa pillugu siunnersuut Inatsisartunit tusaatissatut tiguneqartussanngorlugu saqqummiuppaa.

Ilanngulluguttaaq Inatsisartut Ombudsmandiat 2017-imi suliaanut Inatsisinut Ataatsimiititaliap qujassuteqassaaq.